



Parluamentuvalličendu 2015

Parluamentuvalličendu pietäh joga nelläs vuosi. Valličendas vallitah 200 deputuattua piättämäh mejän yhtehizis azielois. Vuvven 2015 parlamentuvalličendat pietäh pyhänpiän 19.4.2015.

Parluamentan ruavot

Suomen konstitutsien mugah valdu Suomes kuuluu kanzale. Kanzu valliččou parlamentan piättämäh dielolois.

Parluamentan tärgevin dielo on piästi ilmah zakonoi, kudamien mugah yhteiskundu ruadau.

Toine tärgei dielo on piättiä valdivon budžietas. Budžietas miärätäh, mis valdivo suau dengua da mih dengat käytetäh. Parluamentan ruado sežo on kaččuo valdivon talohuon hoiduo.

Ken suau andua iänen?

Parluamentuvalličendas suau andua iänen jogahine Suomen kanzalaine, kudai on täyttänyh 18 vuottu ei myöhemi migu valličendupäivänny 19.4.2015.

Ku sinul ollou oigevus andua iäni parlamentuvalličendas, suat poštači ilmoituskartin. Se työnnetäh kevätkuul.

Ilmoituskartis on sinun nimi, valličendupäivy da edukädeh iänenannandan aigu da tiedo, kus voit andua iänen valličendupäivänny. Ilmoituskartis myös suat luvettelon koin lähäl olijois paikois, kus voit andua iänen edukädeh da muudu targiedy tieduo valličendas.

Kelle voit andua iänen?

Voit andua iänen ristikanzale, kudai on kandiduatannu sinun omas valličendupiiris.

Suomi on juattu 15 valličendupiirih. Jogahizes valličendupiiris ollah omat kandiduatat. Sinun valličendupiiri ilmoitetah ilmoituskartis.

Tieduo kandiduatois suat ezimerkikse lehtis, televideenies libo internetas ozuttehes www.vaalit.fi.

Jogahizel kandiduatal on oma kandiduattunoumer. Sinun valličendupiirin kandiduatois noumerat lövvytäh ezimerkikse iänenandopaikoil. Noumerat tavallizesti nävytäh i kandiduatois valličendureklamois.

Valličendupeittozus

Jogahine iče piättäy, tahtougo andua iänen. Jogahine iče piättäy i sen, kenele tahtou andua iänen. Iänenando-oigevuoh kuuluu valličendupeittozus. Se tarkoittau, ku sinun ei tarviče kerduo nikelle, kudamale kandiduatale annat iänen.

Iäni annetah valličendukamorkas, kudamas niken ei näje, kelle annat iänen.

Konzu voit andua iänen

Parluamentuvalličendas voit andua iänen libo valličendupäivänny libo sidä enne edukädeh iänenannos.

Iänenando valličendupäivänny

Valličendupäivy on pyhäpäivy 19.4.2015. Valličendupäivänny iänenandopaikat ollah avvoi 9-20 čuasul. Voit andua iänen vaiku sit iänenandopaikas, kudai on merkitty sinun ilmoituskartih.

Iänenando edukädeh

Ku et voinne libo tahtone andua iändy valličendupäivänny, voit andua iänen edukädeh. Edukädeh voit andua iänen mistahto edukädeh iänenandopaikas Suomes libo ulgomual. Edukädeh iänenando algavuu 8.4.2015 da lopeh 14.4.2015. Kačo edukädeh iänenandopaikan avvoiolenduaijat luvettelos, kudaman suat ilmoituskartinke, libo internetas ozuttehes www.vaalit.fi

Ken avvuttau?

Valličenduvirguniekat da valličenduavvuttajat autetah da nevvotah sinuu joga kohtas. Ku tarvinnet abuu iänenannos, voit kzyö valličenduavvuttajua abuh iänenandokamorkah. Valličenduavvuttajannu voi i olla ristikanzu, kudaman olet iče vallinnuh. Valličenduavvuttai ei sua nikelle sanuo, kelle annoit iänen.

Iänenando kois

Ku ollet vaigiesti niistii libo pitkän aigua voimatoi, voit andua iänen edukädeh omas kois. Ilmoita sit telefonal libo työnnä ankiettu kommuunan keskusvalličendukomissiele, ei myöhembi 7.4.2015 16 čuassuu. Komissien telefonnoumeran lövvät ilmoituskartis. Omahoidaigi voi ilmoittauduo kodi-iänenandoh. Bol'ničois da laitoksisgi voit andua iänen edukädeh, ken ollou sie hoijettavannu.

Enne iänenanduo

Ota kemale iänenandoh hengilötovestus, ezimerkikse pasportu, identitiettukarti, ajoluba libo muu nengoine virralline dokumentu, kudamas on sinun fotokuva. Iänenandopaikal sinuu vuottau valličenduvirguniekkku. Häi kaččou sinun identitietan hengilötovestukses da andau iänenandolipun.

Nenga annat iänen valličendupäivänny

1. Mene iänenandokamorkah täyttämäh iänenandolippuu. Kirjuta iänenandolippuh selgiesti sen kandiduatan noumer, kudamale annat iänen. Ku et mustane noumerua, eči se luvettelos (kandiduattulistoin kogomus),

kudai on iänenandokamorkan seinäl. Nimidä muudu älä kirjuta iänenandolippuh.

2. Taivuta iänenandolippu keskel muga, ku niken ei sua nähtä noumerua. Lippuh on merkitty kohtu, kus se pidäy taivuttua.
3. Mene järilleh valličenduvirguniekalluo. Häi panou lippuh štampan.
4. Lykkiä iänenandolippu valličendu-uurnah.

iänenando edukädeh

1. Mene iänenandokamorkah täyttämäh iänenandolippuu. Kirjuta iänenandolippuh selgiesti sen kandiduatan noumer, kudamale annat iänen. Ku et mustane noumerua, eči se luvettelos, kudaman voit nähtä iänenandopaikas. Nimidä muudu älä kirjuta iänenandolippuh.
2. Taivuta iänenandolippu keskel muga, ku niken ei sua nähtä noumerua. Lippuh on merkitty kohtu, kus se pidäy taivuttua.
3. Konzu olet täyttänyh valličendulipun, mene järilleh valličenduvirguniekalluo. Häi panou lippuh štampan da andau sinule maksankarvazen valličendukanvertan. Pane lippu kanvertah da liimua umbek kanvertu.
4. Sen jälgeh valličenduvirguniekku kyzzy sinuu allekirjuttamah ankietan. Nenga allekirjuttamal ankietan tovestat, ku olet iče täyttänyh lipun, virguniekku on pannuh štampan da olet iče salvannuh sen kanvertah.
5. Lopukse valličenduvirguniekku panou valličendukanvertan da allekirjutetun ankietan keldazeh työnändykanvertah, salbuau sen da työndäy keskusvalličendukomissieh.

Nenga olet andanuh iänen da voit lähtie valličendupaikalpäi.

Brošuuru löydy internetas ozuttehes www.vaalit.fi
Oigevusministerstvu